



Broj: 01-05-8918/16
Sarajevo, 15.04.2016. godine

SKUPŠTINA KANTONA SARAJEVO
-OVDJE-

Predmet: Odgovor na zastupničko pitanje zastupnice Mersihe Mehmedagić, dostavlja se

Zastupnica Mersiha Mehmedagić je na 13. Radnoj sjednici Skupštine Kantona Sarajevo održanoj dana 30.03.2016. godine u okviru tačke Dnevnog reda „Zastupnička pitanja, inicijative i odgovori“, a u skladu sa Poslovníkom Skupštine Kantona Sarajevo, postavila zastupničko pitanje:

„Molim Ministarstvo za boračka pitanja da mi odgovori koje aktivnosti je poduzelo, ili planira poduzeti, kako bi se sistemski riješio problem zapošljavanja djece šehida, poginulih, umrlih i nestalih branioca, ratnih vojnih invalida, dobitnika ratnih priznanja i odlikovanja, ratnih vojnih zarobljenika i demobilisanih boraca? Koji su efekti dosadašnjih aktivnosti, te koliko ima nezaposlene djece gore navedenih kategorija po općinama u Kantonu Sarajevo?“

Na postavljeno zastupničko pitanje dajemo slijedeći

ODGOVOR

Ministarstvo za boračka pitanja Kantona Sarajevo vrši upravne i stručne poslove utvrđene Ustavom, zakonom i drugim propisima u oblasti ostvarivanja prava ratnih vojnih invalida i članova njihovih porodica, članova porodica šehida, članova porodica poginulih, umrlih i nestalih branioca, dobitnika ratnih priznanja i odlikovanja i članova porodica poginulih, umrlih i nestalih dobitnika ratnog priznanja i odlikovanja, ratnih vojnih zarobljenika i demobiliziranih branilaca kao lica zaslužnih u odbrambeno-oslobodilačkom ratu sa područja Kantona Sarajevo.

Prava, uvjeti i postupak za ostvarivanje prava, korištenje i prestanak prava, kao i druga pitanja od značaja za ostvarivanje prava pripadnika boračke populacije uređena su odredbama Zakona o pravima branilaca i članova njihovih porodica („Službene novine Federacije BiH“, br. 33/04, 56/05-Ispravka, 70/07 i 9/10) i Zakona o dopunskim pravima boraca – branitelja Bosne i Hercegovine („Službene novine Kantona Sarajevo“, br. 45/12-Prečišćeni tekst i 26/14).

Odredbama člana 5. Zakona o dopunskim pravima boraca – branitelja Bosne i Hercegovine utvrđena su prava gore navedenih lica pripadnika boračke populacije. Članom 23. istog Zakona propisan je prioritet u zapošljavanju i isti glasi: „Lica iz člana 1. i 2. ovog Zakona ostvaruju pravo na prvenstvo pri zapošljavanju, a pritom prioritet imaju djeca šehida-poginulih branioca, umrlih ratnih vojnih invalida i umrlih dobitnika ratnih priznanja i odlikovanja. Kantonalni organi uprave i kantonalne upravne organizacije, Grad Sarajevo, općine, kao i sva pravna lica čiji je osnivač Kanton, Grad Sarajevo ili općina, odnosno koja se finansiraju iz budžeta sa učešćem od najmanje



25%, dužni su prilikom prijema u radni odnos obezbijediti prioritet licima iz člana 1. ovog Zakona, kao i članovima uže porodice ratnog vojnog invalida.“

Član 24. Zakona o dopunskim pravima boraca – branitelja Bosne i Hercegovine odnosi se na novčane pozajmice za otvaranje radnih mjesta i glasi: „Za otvaranje radnih mjesta, kojim bi pitanje zaposlenja riješila lica iz člana 1. ovog Zakona, kao i članova njihove uže porodice, mogu se dodijeliti novčane pozajmice i krediti. Vlada Kantona će posebnim propisom utvrditi način i uvjete za odobravanje pozajmica iz prethodnog stava.“

Članom 59. istog Zakona propisana je prednost pri korištenju programa nadležnih zavoda za zapošljavanje koji glasi: „Javna ustanova Služba za zapošljavanje Kantona Sarajevo dužna je svojim aktima propisati da prednost pri korištenju programa zapošljavanja imaju lica iz čl. 1. i 2. ovog Zakona.“

U vezi sa problemom zapošljavanja pripadnika boračke populacije ističemo da ovo Ministarstvo po pojedinačnim zahtjevima izdaje preporuke za zapošljavanje prema institucijama i pravnim licima ali da isto nema mogućnosti zapošljavanja lica iz ove kategorije, niti ima nadležnosti obavezati institucije i pravna lica da primjene odredbe navedenog člana 23. Zakona.

Dalje, ističemo da Ministarstvo ima aktivnosti na programima zapošljavanja pripadnika boračke populacije u vidu pozajmica za otvaranje radnih mjesta i da su pokrenute aktivnosti na programu realizacije poticajnih mjera zapošljavanja pripadnika braniteljske populacije. Pravo na dodjelu pozajmica za finansiranje programa za zapošljavanje demobilisanih boraca, ratnih vojnih invalida i članova porodica šehida i poginulih boraca mogu ostvariti sva pravna i fizička lica sa područja Kantona Sarajevo koja su registrovana za obavljanje privredne djelatnosti a koja otvaraju nova radna mjesta i planiraju zapošljavanje lica iz člana 1. Zakona o dopunskim pravima boraca – branitelja Bosne i Hercegovine ili članova porodičnog domaćinstva tih lica. Programom realizacije poticajnih mjera zapošljavanja pripadnika braniteljske populacije implementira se projekat podizanja zasada maline i nabavka plastenika za boračku populaciju koja ispunjava uvjete za plasteničku proizvodnju sa ciljem da se dugoročno riješi pitanje egzistencije kao i uspješnije potpuno uključivanje u društvo određenog broja pripadnika braniteljske populacije i članova njihovih obitelji, te da se poboljša ukupna socio-ekonomska slika lokalnih zajednica i omogućiti zapošljavanje.

U vezi efekata dosadašnjih aktivnosti ističemo da se na godišnjem nivou u okviru programa pozajmica za otvaranje radnih mjesta, zaposli do petnaest lica, te da su ove godine pokrenute aktivnosti na programu realizacije poticajnih mjera zapošljavanja pripadnika braniteljske populacije.

Vezano za pitanje koliko ima nezaposlene djece boračke populacije po općinama u Kantonu Sarajevo, obaviještavamo Vas da ovo Ministarstvo ne raspolaže podacima o broju nezaposlene djece boračke populacije.

S poštovanjem,

Obradila: Derva Husejnović
Kontrolisala: mr. Belma Adilović

Dostaviti:

- Predsjedateljici Skupštine Kantona Sarajevo,
- Sekretaru Skupštine Kantona Sarajevo,
- Sekretaru Vlade Kantona Sarajevo,
- A/a.



web: <http://mbp.ks.gov.ba>
e-mail: mbp@mbp.ks.gov.ba
Tel: + 387 (0) 33 562-012, Fax: + 387 (0) 33 562-251
Sarajevo, Reisa Džemaludina Čauševića 1

